



Visoki predstavnik čestitao njemačkom predsjedniku Steinmeieru

Visoki predstavnik u BiH Valentin Inzko čestitao je Frank-Walteru Steinmeieru na izboru za predsjednika Savezne Republike Njemačke i poželio mu uspjeh u novoj ulozi.

“Mnogi građani širom Evrope, i u drugim dijelovima svijeta, danas vide Njemačku kao svjetionik nade i humanizma. I to s pravom. Kao što je u svom govoru prilikom preuzimanja dužnosti naglasio predsjednik Steinmeier: ‘Njemačka bi trebala biti utočište nade, u vrijeme kad se demokratske institucije širom svijeta nalaze u opasnosti.’ Izbor gospodina Steinmeiera je dobra vijest za BiH, imajući na umu da je on jasno izrazio stav da Evropska unija ne može biti kompletna bez Zapadnog Balkana i da neprekidno podržava evropsku perspektivu svih zemalja iz ovog regiona. U svojstvu ministra vanjskih poslova, a zajedno s bivšim ministrom vanjskih poslova Velike Britanije, gospodinom Phillipom Hammondom, gospodin Steinmeier je bio inicijator novog evropskog pristupa Bosni i Hercegovini, što je ovoj zemlji omogućilo da ubrza napredak na svom putu ka EU,” rekao je visoki predstavnik.

Inzko je naglasio kako je “sudbina Njemačke u velikoj mjeri i sudbina Evrope, a samim time i Balkana. Potpuno sam uvjeren da će u svom novom svojstvu Frank-Walter Steinmeier nastaviti podržavati BiH i njenu evropsku budućnost.”

Novoizabrani predsjednik Savezne Republike Njemačke poslao je kratku poruku visokom predstavniku, zahvaljujući mu na čestitkama.